

09 MAR 1998

Mahathir-Perbincangan

MAHATHIR ADAKAN PERBINCANGAN DENGAN PEMIMPIN MYANMAR

Oleh: Syed Jamil Jaafar

YANGON, 9 Mac (Bernama) -- Perdana Menteri Datuk Seri Dr Mahathir Mohamad mengadakan perbincangan di sini hari ini dengan pemimpin Myanmar Jeneral Than Shwe mengenai isu-isu serantau termasuk penggunaan mata wang Asean bagi perdagangan antara Asean.

Dr Mahathir, yang memperjuangkan rancangan menggunakan mata wang Asean, sebagai cara untuk mengurangkan kesan kenaikan dollar Amerika terhadap ekonomi rantau ini membangkitkan perkara itu semasa perbincangan antara rombongan Malaysia dan Myanmar di bangunan Parlimen di sini.

Perdana Menteri yang tiba di sini awal hari ini untuk lawatan rasmi dua hari ke Myanmar telah melawat beberapa ibukota Asean untuk mendapatkan sokongan bagi rancangan itu.

Asean dianggotai negara Brunei, Indonesia, Laos, Malaysia, Singapura, Filipina, Thailand, Vietnam dan Myanmar.

Para pegawai berkata kedua-dua pihak juga membincangkan perdagangan barter dan masalah pendatang tanpa izin Myanmar di Malaysia.

Dr Mahathir turut menyaksikan penandatanganan perjanjian mengelak cukai berganda dan memorandum persefahaman mengenai penghapusan visa bagi pemegang pasport diplomatik dan rasmi.

Dua dokumen itu ditandatangani oleh Menteri Luar Datuk Seri Abdullah Ahmad Badawi dan rakan sejawatannya dari Myanmar Ohn Gyaw.

Perdana Menteri juga menanam sebatang pokok di Taman Rakyat sempena lawatannya yang bertujuan meningkatkan hubungan dua hala dan perpaduan serantau.

Malam ini Jeneral Than Shwe, pengerusi Majlis Pembangunan dan Keamanan Negara (SPDC), meraikan Dr Mahathir dan rombongannya pada satu majlis makan malam.

Jeneral Than Shwe sebelum itu menyambut ketibaan Dr Mahathir yang diberikan sambutan permaidani merah dan 19 das tembakan meriam bagi lawatan pertamanya ke Myanmar sejak negara ini menjadi anggota Asean tahun lepas.

Beratus-ratus kanak-kanak yang mengibarkan bendera turut memberikan sambutan meriah ketibaan Dr Mahathir yang diiringi isterinya Datin Seri Dr Siti Hasmah Mohd Ali.

Kali terakhir Dr Mahathir melawat Myanmar ialah pada 1988 sebagai tetamu perdana menteri ketika itu Maung Maung Kha. -- BERNAMA

SJ RON